

Wednesday, April 23, 2025

Time - 2:30pm - 2:35pm

REGIONAL NEWS BULLETIN

(MIDDAY)

INTERNATIONAL HALF MARATHON

Sports Minister Pu Lalnghinglova Hmar chuan International Half Marathon Mizorama buatsaih turin Mizo thalaite zingah infiamna kawnga hmasawwna a thlen tir dawn a ti a, tourism lamah hmasawwna a thlen theih an beisei tih a sawi bawk.

International Half Marathon Mizorama buatsaih tur chungchanga chanchinbumite a kawmna he thu hi sawiin Sports Minister chuan an tum ber chu Marathon map ah Mizoram a tel ve theihna tur ani a ti a, Marathon buatsaih chu hautak deuh mahse Mizoram tan kawng tam takah hmasawwna a thlen dawn tih sawiin thalaite ah hmasawwna tam tak a thlen beisei a ni a ti a, an tum anga a hlawhtling thei anih chuan nakin zelah Mizoram tan mellung pawimawh tak ani dawn tih a sawi.

Sports Minister chuan Marathon an neih tur chu Athletic Federation of India hriatpui intlansiak a ni a ti a, hetah hian Athletic Federation of India ten an rawn endik dawn a, an tlan chak chuan record te pawh siam theih a ni dawn tih a sawi bawk.

Mizoram sawrkar Sports & Youth Services Department, Athletic Federation of India leh Innovations India Pvt. Ltd. tangkawp buatsaih International Half Marathon hi April ni 26, Inrinni hian Rajiv Gandhi Stadium, Aizawlah buatsaih a ni dawn a, Intihsiakna hi hlawm thum a then a ni a, Half Marathon, Open Race leh Fun Race niin Intihsiakna hlawm tinah hian mipa leh hmeichhe tan lawmman tha tak tak siam a ni a, cheng nuai 10 sem chhuah a ni dawn a ni.



REVENUE MINISTER

Wawiina I&PR Auditorium, Aizawl a Mizo Academy of Letters Din Champha, 2025 hmanah khuallian Land Revenue & Settlement Minister Pu B. Lalchhanzova'n MAL Book of the Year, 2024 atana thlan 'Hun Inher Kara Zofate' tih lehkhabu ziaktu Pu F. Vanlalrochana hnenah lawmman a hlan.

Minister chuan Book of the Year, 2024 atana thlan 'Hun Inher Kara Zofate' tih chu lehkhabu tha tak, a eng zawnga Mizo te rilru puthmang kaihruai thei tur, ram kal zelna tura lehkhabu tangkai a nih thu a sawi a. Lehkhabu ziaktuten a eng zawng thlirna lam kutchhuak an nei thei chu lawmawm a tih thu a sawi a. Mihringte kaihruai theitu thuziak tha neih chu mihringte dinchhuahnana tangkai tak a nih thu a sawi a ni.

Minister chuan he huna Mizo Academy of Letters member kalkhawm te chu mimal theuh pawha mi hlu tak, thu leh hla huangah pawh kutchhuak hlu tak tak nei an nih theuh thu a sawi a. MAL member te chu an kutchhuak hlu tak tak te tunlaia mite khawih tam, social media lama phochhuak a, Youtube te hmang tangkai turin a fuih a ni.

Vawiina MAL din champha hmanah hian MAL Diamond Jubilee Souvenir 'Mizo thu leh hla zinkawng' tih chu Minister in a tlangzarh a. Chawhnu lamah 'Duhlian chungchang zirhona' tih thupui hmangin seminar buatsaih chhunzawm a ni bawk.



POSHAN PAKHWADA - 2025

Mizoram puma naupang leh nu nau pai leh nau pawmte eitur tha ei pawimawhna inzirtirna April ni 8 atanga April ni 25 thlenga hman tura ruahman chu District pahnih ah kharna hun hman a ni.

Poshan Pakhwada hun chhung hian naupang kum thum atanga kum ruk inkarte Anganwadi Centre-a an nun bul tan nana thiam thil pawimawh zirtir leh nu naupai, nau pawm, nausen piang tir atanga kum ruk hnuai lam leh tleirawl ten an kum mila zir tur inkhaidiat mumal taka chaw tha khamkhawp an dawn theih nan leh chaw tha kham khawp an dawn loh avanga natna chi hrang hrang um bo tum a ni.

Nimina kharna hun Kolasib-a hmanaah Anganwadi chu naupangten chaw tha leh ei tur dang an dawnna hmun chauh nilovin, an phak tawka ziaak leh chhiar an zirna hmun leh nundan tha an zirna hmun anih thu te, nu leh pate pawhin an hlut thiam a, an chhawr tangkai thiam a tul thu te tarlan a ni. Nimin vek khan Khawzawl ICDS Project bultumin Khawzawl Vengthar YMA Hall-ah a kharna inkhawm neih a ni a, CDPO Pi Esther Laltlinpuui chuan Anganwadi tinah Coordination Committee din a nih thu leh Coordination Committee kaltlangin khawtlang mipuite nen Anganwadi enkawlinaah thawhhona thatak neih thin a ni tih a sawi.

Nu leh naupang hriselna ngai pawimawh tura inzirtirna Poshan Pakhwada thawh 7-na hi Mizoram pumah April ni 8 atang khan hman tan niin April ni 25 thleng awh tur a ni a, hemi hun chung hian nu tan ni 1000 pawimawhna chungchang te, mipui vantlangin anmahni hmalakna leh duhthua Anganwadi Centre-a an inzhiah luh theihna thehdarh te leh chaw tha ei tawh loh vanga naupang hrisello enkawl dan inzirtir te leh thau lutukna laka inven dan inzirtir te a ni.



J&K

Jammu and Kashmir-a firfiak beihna kal zelah India sipaite chuan hel pawl zinga mi ni ngei a hriat mi pahnih an thah thu an sawi.

India sipai lam thupangtu sawi danin heng pawl zinga mi ni ngei a hriat pahnih te hi Line of Control-a Uri Nala hmunah India sipate nen innang chingin inkahna a chhuak a, india sipai lam hian an kap hlum ta niin sipai thupuangtu chuan a sawi.

Nimin lama Kashmir-a firfiakten khualzin pawl sawilo eng emaw zat an kah hlumna hmun chu Union Home Minister Amit Shah chuan a hmunah tlawhin hemi a hliam tuarte damdawi inah a tlawh bawk.

